

14.10.2021

UKA2021/67/68/69/70

Uunga siunnersuut: Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992-imeersup allanngortinneqarnissaanik, taamaasillutik kaffinnut akitsuutit eqqartorneqartoq § 1, nr. 11 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)

Uunga siunnersuut: Inatsisartunut isummerfigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992- imeersup allanngortinneqarnissaanik, taamaasillutik tiinut akitsuut eqqartorneqartoq § 1, nr. 11 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)

Uunga siunnersuut: Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaat nr. 19 30. oktober 1992-imeersup allanngortinneqarnissaanik, taamaasillutik neqinut akitsuutit eqqartorneqartoq § 1, nr. 13-17 atorunnaarsillugu.

(Inatsisartunut ilaasortaq Jens-Frederik Nielsen, Demokraatit)

Uunga siunnersuut: Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit eqqussukkanut akitsuutit pillugit inatsisartut inatsisaata allanngortinneqarnissaanik, taamaasillutik sukkunut, lakridsinut sukkulaatinut il.il. akitsuutit atuutilersinneqartup § 1, nr. 1-2, Inatsisartut inatsisaanni nr. 23 18. november 2019, atorunnaarsinneqassasut.

(Inatsisartunut ilaasortaq Jens-Frederik Nielsen, Demokraatit)

Inatsisartunut ilaasortap Demokraatineersup Jens Frederik Nielsenip siunnersuutai sisamat ataatsikkoortillugit suliarineqartussat Siumumiit imaattumik oqaaseqarfigissavagut.

2019-imi 18. November immikkoortoq 158 aamma 159 maani inersuarmi amerlanerussuteqartunit akuersissutigineqarput. Immikkoortut taakkua akitsuutinut tunngassuteqarput. Ulloq taanna inatsisartuni uanga nammineq peqataavunga – eqqaamalluarpara ullut maani suliffigisartakkavut nuannersut aammalu nuanniinnerusinnaasut nalilersussagaanni ulloq ullunut ilungersunarnernut ilaammat, Naalakkersuisooqatigiit annernartumik aaliangiisariaqarsimanerat pisussat takkukkumaartut iliuuseqanngikkaannilu annernarnerullutik eqquisussat pinngitsoortikkumallugit. Akitsuutit pineqartut piffissami pineqartumi aamma atuutilersinneqartariaqarnerannut peqqutaqaataalluinnartunut ilaasut tassaasimmamata siuliani Naalakkersuisooqatigiissimasut illuatungiliuttuusunut taakkualu maani inersuarmi siunnersuutigisimasaannut akissaqartitsiumaneq aamma pineqarsimammat. Akitsuutit asuli pilersinneqarneq ajorput, nunattali ingerlatitaanerani



aningaasat pisariaqartinneqartut uani pineqarput, akitsuutillu inuuniarnikkut pinngitsoorsinnaasatsinnik aallerfiusarlutik. Politikimi sulineq taamaappoq aaliangigassat ilaatigut annernartut aaliangerneqartariaqartarmata.

Nuannaarutigarpur Naalakkersuisooqatigiit paasisimammassuk innuttaasut tusarumasaat kisiisa aallaavigalugit sulineq ingerlanneqarsinnaasannigimmat, aaliangigassalli annernarsinnaasut ilaatigut aaliangiivigineqartariaqartarmata. Akitsuutit inersuarmi 2019 oqallisigineqarmata taamani illuatungiliuttuusut oqariartuutigaat akitsuutit innuttaasullu kaasarfiinit aallerneq akuerineqarsinnaanngilluinnartoq, taamaammallu aningaasat allaffissornikillisaanermi kiisalu siunnersortinik nunatta avataanit atuinermi matussuserneqassasut. Naalakkersuisooqatigiit isummatik isumagivissimagunikku ullumikkut uku siunnersuutit aqutugalugit taamaalorsimasinnaagaluarput, imaluunniit ima paasineqassava taamaalorsinnaanertik piviusunnigortissinnaanagu innuttaasunut neriulersitsiniaataasimasut imaqqanngitsut? Eqqaamalluarpara maanna inatsisartunut ilaasortaalersut *Naammaleqaaq*-mik aqqissuuseqataanermikkut akerliussutsimik takutitsinerit arlalissuit ingerlanneqartut pimmeta, aamma qulequtaq pineqartoq maani inersuarmi eqqartorneqarmat tamanna pivoq. Inuit akerliussutsimik takutitsinnaanerat nunat tamat oqartussaananerannik ataqqinnittup illersuisullu pigai tamannalu iliusaavoq kusanartoq torersumik, ataqeqatigiittumik pisullu qanoq ippiavinneranik tunngaveqartumik ingerlanneqarpat, imaanngitsoq illuatungiliuttuuneq aallaavigalugu pissutsit piviusut qimallugit suna tamaat imaaliallannerinnakkut allannigortinneqarsinnaasutut nipilerlugu suaartaatiginerisigut.

Akitsuutit inuussutissarsiornermik ingerlataqarnermi qulaani pineqartut tassalu sukkunut, tiinut, kaffinut neqinullu akitsuutit immikkut inatsisiliunneqartariaqartut maani nunami inuussutissarsiornermi ingerlatsinermi ilaappata. Suliffeqarfimmik ingerlatsisoq immikkut nunatta iluani aningaasanik nalitsorsaanermut nioqqutissaq pineqartoq atussappagu immikkut akeqartinneqartariaqartoq. Assersuutitut atorneqarsinnaavoq imeruersaat Nuuk Imermit sananeqartarnikuusooq maanna sananeqarunnaarnikuusummat sukkunut akitsuutip qaffasippallaarneranik tunngaveqartumik. Siumumiit isumaqarpugut imminut pilersorsinnaanerup tamatigut qaffasinnerpaaffissaaniinnissaannik sulineq ingerlajuartariaqartoq, tamattami soqutigisassaraarput maani nunami nalitsorsarneqarsinnaasut tamaasa pitsaasunik aqutissiuutissallugit, imaanngitsoq inatsisiliorsimanitsinnik ineriartortissinnaasarpassuagut akilersinnaassuseerutsissagivut.

Taamak oqaaseqarluta siunnersuutigineqartut Siumullu siunnersuummut qulequttat pingaartitai ilanngullugit aningaasaqarnermut ataatsimiitsitaliami suliarineqarnissaannut innersuupparput.

https://ina.gl/dvd/EM2019/pdf/media/2544228/pkt159_em2019_indfaerselsafgift_lov_kal.p

Vivian Motzfeldt, Siumut